

大清文宗協天翊運執中垂謨懋德振武聖孝淵恭端仁寬敏
顯皇帝實錄卷之二十六

咸豐元年辛亥。正月癸卯。諭軍機大臣等。陳阡奏請裁陋規
一摺。據稱江西學政按臨考試。每府需用棚規。前任學政孫
葆元。收受規項。不一而足。現任學政張芾。亦復踵而加厲等
語。該省歷任學政。是否循照舊章。相沿收受。著陸建瀛。陸應
穀。按照摺內所指各情。秉公確查。據實具奏。原摺著鈔給閱
看。將此各諭令知之。○是日。駐蹕半壁店行宮。○甲辰。駐蹕
秋瀾行宮。○乙巳。

上詣

永福寺拈香。○諭內閣李星沅勞崇光向榮奏請調營員分帶楚兵一摺。湖南靖州協副將博春准升鎮筵右營遊擊瞿騰龍著署湖廣總督龔裕迅飭該二員兼程赴粵。交李星沅等酌飭分帶楚省官兵以資策遣。○又諭李星沅勞崇光奏請分局收捐一摺。廣東暫開捐輸原為兩省勦匪之用。現在廣西需費較繁。既據奏該省紳民及外省士商捐貲助餉情形踴躍。若必令赴廣東報捐未免轉增周折。著准其於廣西省城設立分局就近收捐。查照部行章程妥辦。○又諭李星沅勞崇光奏查明臨事逃避之都司請旨革職拏問一摺。廣西署龍憑營都司譚永德於賊匪尚未入境之先即將關防

等件。交該營把總看管。先自逃避。迨賊匪竄入龍州。該州知州被賊掠去。又未能即時救護。所稱打仗受傷之處毫無憑據。顯係捏飾。似此喪心無恥。實堪痛恨。譚永德著革職拏問。交該大臣等嚴審確情。按律治罪。尋部議。譚永德擬問斬監候。業已畏罪自盡。應毋庸議。從之。○諭軍機大臣等。據李星沅等馳奏各摺件。已分別明降諭旨。均依議行矣。另片奏。縷陳籌勦事宜等語。解散脅從。誠用兵之良策。然須實在鄉愚無知。被賊裹脅者。自宜原其一綫。准予自新。其中詐偽情形。必當確加密察。儻係計圖內應。探我虛實。或為利所動。暫時投誠。旋即反覆。賞盜之戒。不可不知。據稱辦理可有端倪。想

該大臣等確察情形。不至墮賊奸計。且賊匪近來糧草火藥。勢將不繼。正當趁此機會。官兵全力攻勦。壯練分段兜擒。以期迅就殄滅。古人用兵。有以多制勝者。亦有以少擊眾者。全在相地度機。用人得當。固不必盡出一轍也。現在賊匪究有幾股。每股頭目。確係何人。前次奏報。均未詳悉。開陳朕心甚為懸繫。所有前經添調之黔兵一千名。及所請調之廣東潮州兵。均著該大臣。迅即分咨飛調會勦。仍當迅速籌辦。毋致老師糜餉。坐失事機。昨據喬用遷奏。訊出粵西盜匪股數。並差探情形一摺。鈔給該大臣等閱看。其所稱賊匪姓名圖章暗號。均著嚴密訪拏。悉數偵獲。該大臣即分咨雲南。貴州。湖

南。廣東。各鄰省。分飭各交界地方文武。協力同心。互相堵截。如有賊匪竄往。或各該省土匪。與粵西賊匪勾結。一經獲訊。得有該匪等股首盜窩真實情形。著各該督撫。一面具奏。一面飛咨該大臣等。迅速掩擒。免致遲誤。前諭令查閱正鳳貽誤實在情形。並此外劣蹟。著即據實具奏。將此由四百里各諭令知之。○賞蹕路經過看守各行宮弁兵半月錢糧。○予廣西陣亡都司雷振坤。千總張世成。合永平。把總張彩雲。石貴。李逢春。馬良春。王恩。詔外委張應星。雲騎尉薛大經。祭葬世職。額外外委易閏昌等。賞卹如例。○是日駐蹕梁格莊行宮。翼日如之。○丙午。

上恭謁

奉陵

奉東陵

昌陵。俱未至碑亭。即降輿慟哭。步入

隆恩門。詣

寶城前行禮。躬奠哀慟。王以下文武大臣官員均隨行禮。○御

更衣幄次。冠摘纓緯。詣

孝和睿皇后几筵前行禮。躬奠哀慟。王以下文武大臣官員均

隨行禮。○御更衣幄次。服縞素。恭謁

慕陵。未至碑亭。即降輿慟哭。步入

隆恩門。詣

宣宗成皇帝几筵前。行周年大祭禮。躬奠哀慟。王以下文武大

臣官員均隨行禮。○御更衣幄次。冠綴纓緯。詣

孝穆成皇后

孝慎成皇后

孝全成皇后寶城前。行禮。躬奠哀慟。王以下文武大臣官員均

隨行禮。○御更衣幄次。服縞素。詣

宣宗成皇帝几筵前。行辭奠禮。○賞守護

昌陵

慕陵。值班官員紬各一疋。兵丁半月錢糧。○丁未。諭軍機大臣

等。王懿德奏。由京啟程。行至河南。見祥符至中牟一帶。地寬六十餘里。長逾數倍。地皆不毛。居民無養生之路等語。河南自道光二十一年。及二十三年。兩次黃河漫溢。膏腴之地。均被沙壓。村莊廬舍。蕩然無存。迄今已及十年。何以被災窮民。仍在沙窩搭棚棲止。形容枯槁。彫敝如前。覽奏深堪憫惻。著潘鐸親往該處履勘。查明從前如何撫恤。是否辦理不善。並現在窮黎戶口實數若干。應如何設法安插之處。悉心籌計。妥議具奏。民生疾苦。地方大吏。必應隨時留意。况地近省垣。耳目尤切。該撫自當仰體朕懷。俾中澤哀鴻。得謀安集。庶不負父母斯民之責也。將此諭令知之。○是日回鑾。駐蹕秋瀾。

行宮。○戊申。

孝穆成皇后忌辰。遣官祭

陵寢。○吏部以大學士賽尚阿。應定何殿閣請。得旨。著為文華殿大學士。○是日。駐蹕半壁店行宮。○己酉。諭軍機大臣等。周天爵奏。馳抵粵西。探聞賊匪情形一摺。所論頗為明晰。並以大黃江一股會匪。地險人眾。亟宜先事戡除。與李星沅等前奏。擇要進攻。所見不謀而合。昨據李星沅奏。因積雨連旬。滇兵尚未到齊。現在設法解散脅從。懸賞購募首逆。擬合湖南雲貴各處官兵。加以壯練。由提督向榮策遣進攻。目下計已接仗。李星沅。向榮。謀勇兼施。自必將金田會匪。掃穴擒渠。

此處辦理得手。則右江各屬股數雖多。自然聞風瓦解。可成摧枯之勢。惟行軍之要。首在臨事而懼。好謀而成。粵西羣盜如毛。豕突鴟張。未可輕視。即使金田奏捷。尚待次第掃除。周天爵懃直樸誠。甚有血性。向榮亦勇敢過人。朕心深所嘉許。但恐過於勇往。所向無前。轉不免輕進疏率之失。李星沅計慮務出萬全。自屬老成持重。但恐過於慎重。又不免遲誤事機。行兵事勢機宜。所爭間不容髮。需遲固屬不可。輕銳尤屬非宜。李星沅既命為欽差大臣。自宜總領戎行。專司籌辦。而周天爵向榮各受知遇重恩。務各殫竭智力。相助為理。現在周天爵甫抵桂林。向榮在潯。李星沅在柳。總須扼要分防。仍

復和衷合辦。使三人如一人。協力同心。剛柔互濟。泯意見而杜推諉。於事方為有濟。朕引領南顧。宵旰焦勞。想李星沅周天爵向榮定能不負誥誡。速掃賊氛。以慰廑望。周天爵現署巡撫。職兼軍務。儻各屬有須親赴勦辦。未便坐失事機。隨時會同李星沅等。相機督勦。其地方尋常事件。藩司勞崇光儘可代理。驛站一切。臬司吳鼎昌亦可分辦。固不必辭撫篆而專辦軍務也。至李殿元宋煜陶玉德前已有旨革職。拏問治罪。著即嚴訊定擬具奏。已革巡撫鄭祖琛前經李星沅稱其尚能熟悉該處情形。准令隨營差遣。現在該大臣到粵已有數月。自能訪知一切。該革員毋庸仍留軍營。著即飭令回籍。

將此由四百里諭知李星沅周天爵向榮並傳諭勞崇光吳鼎昌知之○是日駐蹕黃新莊行宮○庚戌

孝聖憲皇后忌辰遣官祭

奉東陵○

上詣

大高殿行禮○還宮○辛亥詣

壽康宮問

皇貴太妃安○諭內閣朕念深典學御極之始即欲舉行日講舊典禮臣以乾隆嘉慶年間

兩朝訓諭皆以此事易滋流弊徒尚虛文俱奉

命停止是以斟酌未行然朕心未嘗不念茲在茲也尚書有言

曰辭尚體要又曰不由古訓于何其訓儒臣進善於君援古

即以證今若紛紛論列時事恐啟挾私逞臆之端轉失講道

沃心之義朕幾務餘閒將於翰詹諸臣中輪流選派親命題

目各擬講義分日進呈在朕既可以古為鑑且以觀諸臣器

識學問為量能授任之資庶幾上下交相勉勵用副朕集思

廣益崇實黜浮至意○又諭給事中蘇廷魁陳奏一摺朕詳

加披覽所稱求宏濟之道防驕泰之萌意在推誠任賢慎始

圖治能見其大朕甚嘉之其論孝廉方正一條亦合循名責

實之意著各省督撫學政認真訪擇務將品學兼優眾所推

服之人切實保舉以備錄用。毋得虛應故事。名實不符。如所舉非人。惟濫保之員是問。其各慎之。○又諭徐繼畬奏請將僉差不慎之知縣議處一摺。福建署南平縣知縣劉用錫於接解盜案內。應行質訊人犯。並不嚴飭差役小心管解。以致九犯全行脫逃。非尋常疏忽可比。劉用錫著交部嚴加議處。其任聽差役推諉。漫無覺察之水口縣丞。亦著該撫查明送部議處。該撫即勒提各兵役解省。提同已獲二犯。研訊確情。分別究辦。未獲七犯。仍飭嚴拏務獲。按律懲辦。○諭軍機大臣等。前因福建租住神光寺二夷。欲搬至道山觀居住。降旨令裕泰確查情形具奏。茲據徐繼畬奏稱。夷人已於十一月

十二月內。先後搬至道山觀居住。將神光寺房屋交還。並將用印之租約。亦繳還塗銷等語。前任侯官縣知縣興廉。前因辦理不善。降旨革職。何以此次夷人搬移。復責成該革員辦理。著裕泰查明徐繼畬有無迴護徇庇等情。並遵前旨飭查各件。一併據實具奏。將此諭令知之。尋奏徐繼畬責成該革員經理。實因與該夷先有搬移之約。不使該革員置身事外。尚無迴護徇庇別情。報聞。○以福建上年晚稻歉收。暫緩各屬買補動缺穀石。○壬子。諭內閣翰林院自學士以下。詹事府自庶子以下。著該衙門將現任人員名單。開列進呈。按月更換一次。○又諭賡福奏。遵查已革都統任內所辦事件。並

叅革人員呈訴各情一摺。已革委署翼長車凌皮勒巴勒黨車林。既經賡福查看該二員精力未衰。於牧務可期得力。著照所請。毋庸革退。令其回羣當差。仍著隨時查察。如精力稍形遲鈍。即著據實甄別。其休致總管車林丕勒及伊子協領嘎勒桑達爾窄。被叅各情。著刑部提訊雙德。按照賡福摺內情節。取具確供奏明。即交賡福就近秉公查辦。○又諭。陸建瀛奏。被叅知縣具稟申訴。請歸案查辦一摺。前任江西廬陵縣知縣陳雋。前經學政張芾遵旨查奏陳阡案內。降旨解任。交陸應穀查辦。茲據該員具稟申訴。虛實均應根究。著陸建瀛會同陸應穀。將此案前後各情節。秉公確查。據實具奏。毋

稍含混。○又諭。莊浪城守尉懷成奏。馬廠地界。久被番民侵占耕種。懇請查辦一摺。著琦善派委妥員。確實查勘。應如何辦理之處。覈議具奏。涼州副都統興泰。因何不肯會銜。著一併查明覆奏。○諭。軍機大臣等。據禮部奏稱琉球國使臣在部呈遞稟函。復以暎夷在彼逗遛。懇求開導撤回等語。此事前已疊次降旨。諭令該大臣向叟酋設法開導。飭令撤回。茲復據該國稟稱。不惟叟噶吟尚未撤去。且屢有暎夷船隻到彼。惡言驚嚇。來去靡常。以致該國日久憂慮。琉球國臣服天朝。最稱恭順。况該王世子年幼初立。屬令使臣到京具稟。豈能置之不問。著徐廣縉仍遵前旨。再向叟叟相機開導。諭令

迅將咱噠哈並其妻子人等一律撤回。以免驚擾而恤藩封。琉球使臣原稟。著鈔給閱看。將此諭令知之。○又諭。本日據禮部奏。琉球使臣在部呈遞稟函。因暎夷在彼逗遛。懇求開導撤回等語。已有旨交徐廣縉查辦。著禮部即遵旨傳諭該國使臣知之。○兩江總督陸建瀛奏。遵籌添塘避牐。擬俟本年漕竣興工。得旨。不可藉詞支吾。亦不可含混了事。○江甯布政使楊文定。奏報回任日期。得旨。爾之才具。斷不至因循廢事。但屬員之因循蒙混。尤應認真察劾。不患不明。惟患不公。朕期汝事事須一誠字一當字。○命內閣中書姚近韓。左春坊左贊善郭沛霖。戶部員外郎顏錫惠。禮部主事江健。江

西道御史存葆。於本月二十七日起。每日一員聽候召見。○
癸丑。

上詣

壽安宮西所。問

如皇貴太妃安。○詣

壽康宮。問

皇貴太妃安。○諭軍機大臣等。有人奏。會匪結黨。勾引蔓延。請飭查辦一摺。並請嚴禁私曠出境等語。據稱漳州府屬。會匪嘯聚數萬人。以廈門人陳馨。同安人王泉。為大頭目。設局斂錢。鄉愚被其煽惑。橫行郡縣。恣意搶奪。上年十一月間。

有賊目王靖。李景黃允。劉四等。各擁眾入會。地方文武不能查辦。現在漳泉各處。道途梗塞。似此盜賊公行。若不及早殲除。必致釀成巨案。裕泰甫經簡調。無所用其迴護。著於到任後。嚴密確查。該匪等有無勾通夷匪。假借名色。迫脅良民。其傳習者共若干縣。實在黨與人數多少。與兩廣土匪。是否聯為一氣。密飭明幹妥員。不動聲色。將頭目陳馨。王泉。先行購綫設法擒獲。其餘以次偵捕。不難悉數就擒。該省武職陳興隆。尚知認真緝捕。而文員乃專事輕縱。此種惡習。必應懲創。毋令該地方官以容隱在前。意存消弭。規避處分。至淡水廳屬。產有硫磺。有無奸民偷採。往販外夷。去年該夷有請赴雞

籠山採煤之謠。未必非借此影射。亟宜實力查禁。著一併嚴飭該鎮道。查明覈辦。並嚴派委員。前往訪查。曾否封禁。以杜奸萌。是為至要。原摺片著鈔給閱看。將此諭令知之。○命山東巡撫陳慶偕。來京陛見。以布政使劉源灝。署巡撫。○甲寅。諭內閣。本年輪應查閱直隸。山西。陝西。甘肅。四川等省營伍之期。直隸著即派訥爾經額。山西著即派兆那蘇圖。陝西著即派張祥河。甘肅著即派琦善。四川著即派徐澤醇。逐一查閱。認真簡校。如查有訓練不精。軍實不齊者。即將廢弛之將弁。據實劾參。毋得視為具文。○又諭。徐廣縉。葉名琛。奏勦捕賊匪。大獲勝仗一摺。據稱連平州屬九連山一帶。有前經擊

寶鑑卷二十一
二十一
敗之匪徒屯聚。意圖北竄。經該督撫飭委員弁分三路進兵。探知大夥賊匪盤踞和平縣屬之泃頭墟。即於十二月二十五日五鼓督率兵勇兜擒追殺。翻山十二重。接仗五次。計殲斃賊匪二百五十九名。生擒一百三十八名。餘匪復於次日。經署連平州知州吳昌壽帶領兵勇殲擒多名。韶州一帶潰散匪徒。既經痛加勦洗。不難全力殲除。著即督率文武將佛岡。英德山內藏匿匪徒。嚴行搜捕。毋任伏莽潛蹤。以期淨絕根株。迅速蕝事。至高州。廉州各屬與廣西毗連。防勦尤關緊要。提督陶煜文現已抵任。著即前往該處。會同高廉道宗元醇。妥籌防勦。毋令兩省交界處所。旬結蔓延。以靖賊氛而綏

邊圉。○署廣西巡撫勞崇光奏請將尋常命盜各案。俟軍務完竣。展限審辦。從之。○命委散秩大臣麟興在乾清門行走。○命雲貴總督吳文鎔在紫禁城騎馬。○修浙江錢塘。餘杭山陰。會稽。蕭山。上虞六縣塘隄各工。從署巡撫汪本銓請也。○乙卯。諭內閣。慧成奏。豫禁侈言祥瑞一摺。並片奏整頓吏治等語。所奏甚是。深契朕衷。蓋國家以賢才為寶。豐年為瑞。朕寅承

丕緒。夙夜惕乾。敬念

皇祖仁宗睿皇帝親政。

皇考宣宗成皇帝御極。疊奉

訓諭以侈言祥瑞。近於驕泰。惟益勵寅恭。共圖上理。於日月合璧。五星聯珠。諸奏皆不准宣付史館。朕何敢不恪遵成憲。以迪前光。近來內外臣工章奏。尚無鋪陳符應。粉飾太平之語。但杜漸防微。不可不交相儆惕。况此時東南民氣甫甦。少蘇而兩粵用兵。邪氛正熾。若惑於浮說。徒貽笑於後人。內外諸臣當以敬慎存心。不可少蹈浮夸之習。惟期政通人和。年穀順成。以副朕志。至於吏治廢弛。苦口訓誡。何啻再三。無奈各省州縣親民之官。深染積習。因循不振。總由大吏甄劾不明。勸懲不公。以工於趨承者為開展。以拙於應接者為迂拘。遂至悃悞之吏。沈抑下僚。奔競之徒。濫膺薦牘。人材不振。

國計民生將何賴焉。各督撫大吏。或受


先朝厚恩。或由朕加特簡。於用人行政之際。果能破除情面。懍遵成法。事事矢以實心。濟以實力。何慮頹風不能盡挽。賢才不能奮興。轉移之權。操之自上。諸臣亦分任其責。其各洗心滌慮。共襄郵治。勿復視朕言為具文也。將此通諭知之。○上以祭

社稷壇。自是日始。齋戒三日。○丙辰。

孝儀純。皇后忌辰。遣官祭。

裕陵。○旌表守正捐軀四川巴縣民張國儒妻文氏。崇慶州民杜上崇女金秀。○丁巳。諭內閣。孚郡王奕諱著於四月二十

日卯時入學讀書。○改鑄湖南衡陽縣知縣印信。從巡撫駱秉章請也。



大清文宗協天翊運執中垂謨懋德振武聖孝淵恭端仁寬敏
顯皇帝實錄卷之二十六

